


Fréttabréf ÍMR 2020

HVERFISBLADID
Miðborg & Hlíðar

Íbúasamtök Miðborgar Reykjavíkur eru félag íbúa í Miðborginni og þau sem eiga þar lögheimili og eru 18 ára og eldri hafa kjörgengi og atkvæðisrétt

ÍBÚASAMTÖK MIÐBORGAR



Aðalfundur ÍMR

Aðalfundur Íbúasamtaka Miðborgar Reykjavíkur verður haldinn í Tjarnarsal Ráðhússins fimmtudaginn 15. október kl. 18 með fyrirvara um að sóttvarnarreglugerðir leyfi slíkar samkomur á þessum tíma. Nánar auglýst á Facebook síðu ÍMR og á vef samtakanna midbaerinn.is þegar nær dregur

Venjuleg aðalfundarstörf og íbúar eru hvattir til að mæta og hafa áhrif á starf samtakana

Stjórn ÍMR

Frá formanni

Kórónuveirufaraldurinn hefur sett sitt mark á starf Íbúasamtaka Miðborgar eins og á allt mannlíf í landinu. Takmarkanir á samkomuhaldi hafa verið í gildi síðasta hálfu árið og Spennistöðin, félags- og menningarmiðstöð miðborgarinnar hefur verið okkur lokað því hún er einnig skólahúsnæði og frístundamiðstöð fyrir börn og unglinga. Því höfum við þurft að fresta eða aflýsa ýmsum viðburðum og uppákomum sem til stóð að halda en um þær má lesa annarsstaðar í fréttabréfinu.

Stjórn ÍMR hefur þó haldið reglulega fundi og starfað að því marki sem hægt var og nú boðar hún til aðalfundar í Ráðhúsinu þann 15. október kl. 18. Íbúar miðborgarinnar eru hvattir til að mæta og hafa áhrif. Undirritaður mun láta af stjórnarsetu en hann hefur setið 11 ár í stjórn þar af fjögur ár sem formaður ÍMR og finnst honum tími til kominn að hætta og hleypa öðrum að. Ég vil þakka öllum þeim sem ég hef setið með í stjórn og öllum íbúum miðbæjarins fyrir samstarfið og óska Íbúasamtökunum velfarnaðar í framtíðinni en Íbúasamtök Miðborgar eru mikilvægt afl til hagsmunagæslu fyrir íbúana.

Benóný Ægisson

Leiksvæði og almenningssrými

Íbúasamtök Miðborgar hafa frá stofnun samtakanna beitt sér fyrir því að bæta aðstöðu barna og unglinga í hverfinu yfirleitt í samstarfi við Foreldrafélag Austurbæjar-skóla. Félögin hafa komið því til leiðar að leiksvæðið við Austurbæjarskóla var stórbætt og að fyrsta félagsmiðstöð miðbæjarins var opnuð í Spennistöðinni 2014, fjörutíu árum eftir að fyrsta félagsmiðstöðin í Reykjavík opnaði. Á síðustu fundum stjórnar Íbúasamtakanna hefur mikið verið fjallað um leiksvæði og almenningssrými í miðborginni en á þeim mörgum mætti gera bragarbót.

Á sumum þessara svæða skortir viðhald og umönnun og virðist lítið eftirlit með þeim sumum hverjum. Nokkur



Á Arnarhóli er risastór leikvöllur en á honum er bara kastali og tvær rólur. Einu sinni var líka kofi og gormarugga en það er horfið. Er þetta boðlegt? Og mætti ekki vera gras á einhverjum hluta svæðisins? Eða kartöflugarður?



Mæðragarðurinn. Þarna er ekki eitt einasta leiktæki né nokkuð sem börn gætu dundað sér við. Hvaða erindi gætu mæður þá átt í þennan garð?



Bjarnarstígsróló, skemmtilegur lítill garður sem gengið er inn í frá Bjarnarstíg eða í gegnum port á Njálsgötu. Þarna væri grúpplag að koma upp litlu leiksviði svo krakkarnir gætu leikið leikrit eða verið með brúðuleikhússýningar.

svæði mætti vel gera skemmtileg með fremur litlum tilkostnaði en miklu ímyndunarafl og sköpunarkrafti. Svo eru sum þessara svæða nánast leiðinleg, það eru sömu leiktækin á þeim öllum, kastali, rólur og ruggur; meira að segja vegasöltin eru horfin. Leikvöllirnir minna á hendingu í kvæði Ólafs Hauks Símonarsonar Það vantar spýtur: Þau hafa rólað hundrað milljón sinnum út og inn og mokað sama sandinum í skóinn sinn.

Formaður ÍMR fór um miðbæinn og myndaði sum þessara svæða en ritarinn Guðrún Erla myndaði leiksvæði og garða í Berlín og eru þær birtar hér til samanburðar.



Þetta er Frakkland, almenningsgarður efst á Frakkastíg. Myndi það drepa okkur að gera eitthvað skemmtilegra þarna? Klifurvegg fyrir krakka, hús eða útsýniskörfu í einu trjána, kaðla og hengirúm hangandi í þeim?



Undir þessari óhrjálegu órækt leynist leiksvæði leikskólans Óss sem er fluttur. Garðurinn stendur við Berþórugötu og er í eigu Reykjavíkurborgar. Er þetta í lagi?



Þetta bílastæði er fyrrum leiksvæði Vörðuskóla sem var gagnfræðaskóli hverfisins. Mætti ekki nýta það betur og þá í þágu barna og unglinga hverfisins. Gera það eitthvað svipað og svæðið fyrir neðan Austurbæjarskóla með aðstöðu fyrir knattleiki, hjólabretti, parkour og fleira þessháttar.

Og þá er kominn tími til að bregða sér til Berlínar



Vanrækt hús í miðborg Reykjavíkur

Íbúasamtök Miðborgar Reykjavíkur sendu frá sér eftirfarandi ályktun í júlí 2020:

Í miðborg Reykjavíkur eru tugir húsa sem ekki eru nýtt og hafa sum þeirra staðið auð og vanrækt í áratugi. Ástand margra þessara húsa er með þeim hætti að af þeim stafar hætta, umhverfi þeirra er subbulegt og óheilsusamlegt og ítrekað hefur kviknað í þeim og hefur það sett nærliggjandi byggð í hættu. Ástæður fyrir vanrækslu eigenda þessara húsa eru sjálfsagt margvíslegar en núverandi ástand er óþolandi fyrir nágranna þessara yfirgefnu húsa, auk þess sem komið

er í veg fyrir að þau nýtist til íbúðar eða fyrir atvinnustarfsemi og einnig eru sum þeirra aldursfriðuð. Stjórn Íbúasamtaka Miðborgar Reykjavíkur skorar á byggingafulltrúa og heilbrigðiseftirlit að nota þau verkfæri sem embættin hafa til að koma í veg fyrir þetta háttalag og á borgarfulltrúa og þingmenn Reykjavíkur norður að beita sér fyrir því að lög og reglugerðir verði gerðar svo skýrar að húseigendur komist ekki upp með að láta hús sín standa auð og vanrækt um langa hríð.



Þórgata 6 er byggd í byrjun 20 aldar og er því aldursfriðuð. Þetta er lítið snoturt timburhús sem er mjög illa farið að utanverðu og í kringum það er stór lóð í órækt. Ekki hefur verið búið í húsinu síðasta áratuginn eða lengur. Ekki er að sjá að það sé neitt því til fyrirstöðu að gera þetta hús upp.



Steinbærinn að Klapparstíg 19 var byggður 1879 og er eini steinbærinn sem eftir er í Skuggahverfi og Veghúsastígur 1 er timburhús byggd 1899 og eru því bæði húsin aldursfriðuð. Húsin eru illa farin af vanrækslu enda hefur viðhaldi þeirra lítið verið sinnt en þau hafa ótvírætt varðveislugildi.



Á Öðinsgötu 14a og b standa tvö steinhús sem voru byggð á þriðja áratug síðustu aldar og hafa staðið auð síðan um aldamót. Húsin eru gluggalaus og allt útilit þeirra eins og til hafi staðið að gera þau upp en hætt í miðjum klíðum. Þar sem húsin standa opin er af þeim slysa-hætta fyrir börn og unglinga.



Fréttir af starfi ÍMR 2019-2020

Heil brú í Miðbænum

Verkefninu Heil brú var hleypt af stokkunum 2016 til að tengja saman alla notendur Spennistöðvarinnar og eru einkunnarorð þess: Sköpum, ræðum og leikum okkur saman. Á annan tug uppákoma hafa verið haldnar undir merkjum Heillar brúar en markmiðið með verkefninu er að bæta hverfisandann og sam heldnina í hverfinu. Haldin hafa verið málþing og hugflæðifundir m.a. um aðstæður barna og unglinga í hverfinu, sambýlið við ferðapjónustuna, umferðarmál og fleira en einnig hafa verið haldnar samkomur sem hafa þann eina tilgang að fólk á öllum aldri hittist og hafi það gott og skemmti sér saman.

Vegna samkomubanns hefur þurft að fresta eða aflýsa ýmsum uppákomum sem til stóð að halda eins og málþingi um sambýlið við næturlífið en til þess hafði verið boðið fulltrúum kráareigenda, heilbrigðiseftirlits, lögreglu og borgarráðs auk fulltrúa íbúa. Einnig hefur stjórn ÍMR áhuga á að ræða ástand leiksvæða og almenningsrýma í miðbænum og viðhald og endurbætur á þeim.

Frá vordögum hefur skipulöð dagskrá í Spennistöðinni beðið síns tíma, fyrst sem vorblót, síðan sem síðsumarsblót, þá haustblót en á þessari stundu er ómögulegt að vita á hvaða árstíð blótið verður haldið. Á þessu blóti ætlaði Skólahljómsveit Vesturbæjar og miðborgar að leika, Karl Ágúst Úlfsson vera með trommuhring og þau Sandra og Mamady Sano að kenna afróðans. Þá ætlaði Arite Fricke að vera með sína skemmtilegu flugdrekasmiðju og meiningin var að grilla pylsur og vera með skottsölu eða flóamarkað á planinu fyrir utan spennistöðina.

En áður en kórónuveirufaraldurinn skall á með öllum sínum takmörkunum tókst að koma eftirtöldum viðburðum á koppinn í Spennistöðinni:

Umferð í miðbænum

Fyrsta málþing vetrarins var um samgöngur í miðbænum þann 12. október 2019. Fjallað var um umferðarmál, almenningsamgöngur, akstur með ferðamenn, öryggi skólabarna og ýmislegt fleira. Frummælendur og þátttakendur í pallborði voru samgöngustjóri Reykjavíkurborgar fulltrúar frá Strætó bs og samtökum ferðapjónusunnar auk íbúa.

Bætt verslun og þjónusta

Boðað var til hugflæðifundar um bætta verslun og þjónustu við íbúana í miðbænum 9. nóvember. Niðurstæða umræðnanna var sú að þó svo verslunum með nauðsynjar fyrir íbúa hafi fækkað mikið í miðbænum og ýmis þjónusta td opinberra stofnana hafi færst út í úthverfin þá sé hverfið ekki svo illa statt

miðað við önnur hverfi. Þó væri hægt að gera miklu betur og íbúar þurfa að vera duglegir við að styðja við þá verslun sem þeir vilja halda í.

Vert er að benda á að á vef ÍMR midbaerinn.is eru ítarlegri lýsingar á málþingum og upptökur af þeim.

Skammdegisgleði 2020

Á annað hundrað manns litu við á Skammdegisgleði Íbúasamtakanna í Spennistöðinni 8. febrúar, hlustuðu á Kára Egilsson og Skólahljómsveit Vestur og Miðbæjar, dönsuðu salsa, bjuggu til teikninmyndabækur og páðu veitingar.

Ályktanir ÍMR

Einnig hafa Íbúasamtökin sent frá sér ýmsar ályktanir á tímabilinu enda hefur stjórn þeirra starfað nær óslitið. Eftirtalдар eru þær helstu en þær eru betur kynntar á vefnum midbaerinn.is:

Aðalfundur ÍMR þann 17. október 2019 mótmælti breytttri notkun á Skólavörðustíg 8 en þar var hárgreiðslustofu breytt í sportbar í óþökk íbúa hússins.

Stjórn ÍMR gerði athugasemd við breytingu á deiliskipulagi á svonefndum Frakkastigsreit. Stjórnin lýsti yfir ánægju sinni með að gera eigi upp húsín Laugaveg 33, 33B og 35 í sem upprunalegastri mynd en lagðist gegn því að heimilað yrði að rífa húsín Laugaveg 33A og Vatnsstíg 4.

Stjórn Íbúasamtaka Miðborgar Reykjavíkur skoraði á borgarstjórn Reykjavíkur, menntamálaráðherra, iðnaðar- og nýsköpunarráðherra og eigendur Hverfisgötu 54 sem hýsir Bíó Paradís, að finna lausn á húsnæðisvandræðum þess svo síðasta miðbæjarbíóið gæti verið áfram á sínum stað og geti gegnt menningarhlutverki sínu.

Sameiginlegur fundur stjórna Íbúasamtaka Miðborgar Reykjavíkur, Íbúasamtaka Vesturbæjar og Íbúasamtaka 3. hverfis (Hlíða, Holta og Norðurmýrar) skoraði á borgaryfirvöld að standa vörð um græn svæði og almenningsrými í hverfunum og fór fram á að tekið yrði meira mark á athugasemdum íbúa við deiliskipulagsbreytingar.

Stjórn ÍMR ályktaði um deiliskipulagsbreytingu og lagðist gegn því að reist yrði sjö hæða bygging á horni Frakkastígs og Skúlagötu þar sem nú, samkvæmt gildandi deiliskipulagi frá 1986 er gert ráð fyrir opnu svæði og “hugsanlegri dagvistun”.

Stjórn ÍMR sendi frá sér ályktun um vanhirt hús þann 12. júlí 2020 og er henni gerð betri skil annarsstaðar í fréttabréfinu.

Íbúasamtök Miðborgar

Íbúasamtök Miðborgar

Íbúasamtök Miðborgar Reykjavíkur (skammstafað ÍMR) eru félag íbúa í Miðborginni eins og hún hefur verið afmörkuð sem hverfi á milli Suðurgötu og Garðastrætis í vestri og Snorrabrautar, Flugvallavegar og Hlíðarfótar í austri. Allir íbúar sem eiga lögheimili á þessu svæði og eru 18 ára og eldri hafa kjörgengi og atkvæðisrétt á fundum félagsins. Íbúasamtök Miðborgar Reykjavíkur voru stofnsett á fundi í Iðnó þann 11. mars 2008 og íbúar á svæði þeirra eru nú um 8000.

Markmið

Tilgangur samtakanna og markmið er að efla samhug og samkennd íbúa, vera samstarfsvettvangur íbúa, félagasamtaka og hagsmunasamtaka á svæðinu, vinna að framfara- og hagsmunamálum í hverfinu, standa vörð um sérkenni hverfisins og starfa með Hverfisráði Miðborgar og öðrum

opinberum aðilum sem fara með málefni hverfisins og íbúa þess og íbúasamtökum annarra hverfa.

Stjórn ÍMR

Stjórn ÍMR er svo skipuð: Benóný Ægisson formaður og vefstjóri, Ragnhildur Zoega varaformaður, Guðrún Erla Geirsdóttir ritari, Guðrún Janus gjaldkeri, Eva Huld Friðriksdóttir, Margrét Einarsdóttir og Vilborg Halldórsdóttir meðstjórnendur. Varamenn eru: Einar Thorlacius, Kári Sölmundarson, Magnús Skúlason og Páll Hilmarsson.

Stjórnsýsla

Íbúasamtök Miðborgar hafa átt fulltrúa í Miðborgarstjórn og munu eiga fulltrúa í arftaka hennar, Samstarfshóp um málefni miðborgarinnar. Þá er formaður ÍMR fulltrúi íbúasamtaka í nýstofnuðu Íbúaráði Miðborgar og Hlíða.



Ýmsar hagnýtar upplýsingar fyrir íbúa miðbæjarins

Veraldarvefurinn

Íbúasamtökin halda úti vefnum midbaerinn.is en þar er að finna fréttir og upplýsingar um starf samtakanna, verkefni, málþing, ályktanir, fundargerðir, lög og fleira

Fasbókin

Íbúasamtök Miðborgar Reykjavíkur halda úti Facebook-síðu en þar eru birtar tilkynningar um starfið og upplýsingar um ýmis mál sem koma íbúunum vel og eru þeir hvattir til að læka hana. Síðan er eingöngu upplýsingasíða ÍMR og geta því notendur einungis gert athugasemdir við færslur. Á Fb-síðunum Íbúar í miðborg og Þingholt og nágrenni geta notendur hinsvegar skrifað statusa.

Íbúaráð Miðborgar og Hlíða

Á vef Reykjavíkurborgar má finna upplýsingar um Íbúaráð Miðborgar og Hlíða, fundargerðir og fleira. Íbúaráðið er einnig með Fb-síðu .

Ábendingavefurinn

Á reykjavik.is/abendingar er hægt að senda starfsmönnum Reykjavíkurborgar ábendingu um eitthvað sem þarf að laga, eitthvað sem mætti betur fara í þjónustu

borgarinnar eða annað sem fólk vill koma á framfæri

Borgarvefsjá

Borgarvefsjá er gjaldfrjáls vefþjónusta sem veitir notendum aðgang að ýmsum landfræðilegum upplýsingum um Reykjavík og nágrenni. Alls eru núna veittar upplýsingar um fjórtán efnisflokkar sem heita: Borgarskipting, Götur og stígar, Hús og lóðir, Lagnir, Lýðfræði og fasteignir, Menningarminjar, Myndefni, Mælipunktur, Náttúrufar, Saga og þróun, Íþróttir, Umferð, Þjónusta og Þungamiðjur búsetu. Vefslóðin er borgarvefsja.reykjavik.is

Skipulag

Breytingar á skipulagi er hægt að kynna sér á reykjavik.is/skipulag-i-kynningu

Hávaði

Samkvæmt 4. gr. Lögreglusamþykktar Reykjavíkur er óheimilt að raska næturró fólks. Ónæði vegna hávaða frá veitingastöðum eða framkvæmdum er hægt að tilkynna lögreglu í síma 112 og sé um ítrekuð brot að ræða til heilbrigðiseftirlits Reykjavíkur

Miðborgin á tímum kóvid

Texti og myndir G.Erla



Jóhann Torfason og Ragnhildur Jóhanns, sem eru m.a. þekkt fyrir að kettir Miðborgarinnar sæki til þeirra, fluttu verslun sína Hjarta Reykjavíkur um set á Laugveginum og eru nú á númer 12. Nýja rýmið er stærra og innri hluti þess gallerí. Fyrsta sýningin var með vatnslita-myndum Ragnhildar af exótísku grænmeti – sýninguna nefndi hún Alltaf eldipipar.



Katrín, Arnar og dæturnar Agla og Embla fluttu í Þingholtin í hittifyrri. Í sumar giftu foreldramir sig í Hestagerðinu handan við garðvegginn hjá þeim. Veislan var haldin heima. Að því tilefni var garðurinn við húsið tekinn í gegn og nýr hænsnakofi af finust gerð smíðaður fyrir landnámsþæurnar sem sjá fjölskyldunni fyrir ferskum eggjum.



Alex Jallow opnaði í sumar veitingastaðinn Ogolúgo með mat frá Vestur- og Austur Afríku á Laugvegi 85. Alex sem kom fyrst til Íslands fyrir 19 árum er frá Gambíu og lærði matreiðslu í Gordon Blue skólanum í London. Á staðnum þjónar hinn irskættaði Jonny Fears. Vinsælasti rétturinn er Jollof rice sem kemur frá Wolof ættbálkunum sem býr í Gambíu, Senegal og Míritaníu.



Helgi Björns og Vilborg Halldórsdóttir sem í vor léttu lund landsmanna með þáttunum Heima eru nú aftur komin á skjáinn. Þau segja að í samkomubanninu hafi verið svo mikil kyrrð á Skólavörðuholtinu að það minnti þau á þann tíma þegar þau voru að hefja búskap í lítilli íbúð við Laugaveginn, nýbakaðir foreldrar að byrja í Leiklistaskólanum.



Ásdís Þula opnaði sýningarýmið Þula í Hjartagarðinum í sumar. Þar sýnir hún og selur verk eftir samtíma myndhöfunda sem hún hefur mætur á. Aðalheiður Dagný sem býr og starfar í Berlín opnaði þar nýlega sýninguna Allar leiðir liggja heim. Aðrir sem sýna í ár hjá Þulu eru Dýrfinna Benita, Hugleikur Dagsson, Tólli og Þórdís Zoega.



Janosch Kratz frá Þýskalandi, Katerina Spathi frá Grikklandi og Vikram Pradham frá Indlandi nemar í HÍ og LHÍ búa á horni Spítalastígs og Bergstaðastrætis. Þegar skólar og sundlaugar lokuðu tók Katerína upp á að svamla í baðkarinu á meðan sambýlingarnir æfðu sig í súrdeigs-bakstri. Þau voru líka mikið á svölunum þaðan sem þau ræddu við vini og kunningja sem áttu leið hjá.



Björn og Gullý hafa síðan í vor staðið morgunverðarvaktina á Canopy hóteli á horni Smíðjustígs og Hverfisgötu. Þó gestir hafi ekki verið mjög margir hafa þeir verið fjölbreyttir. Nýlega gisti þar hópur Kópavogsbúa sem að eigin sögn gerði sér bæjarferð til þess að „halda hjólum atvinnu-lífsins gangandi“.



Aðalsteinn Ásberg rithöfundur og útgefandi var búin að leita í nær fjögur ár að aðstöðu í nágrenni við heimili sitt fyrir bóka- og tónlistarútgáfu sína Dimmu. Fyrir nokkrum mánuðum bar leitinn árangur og nú hefur hann opnað litla verslun með bókum og diskum við Óðinsgötu, rétt sunnan við nýuppgerð Óðinstorg sem síðustu vikurnar hefur íðað af lífi.



Aníta Björk sem er að læra pípuþágnir í lönnskólanum og Ísabella Katrín sem stundar nám í Keili fluttu í lítið lítskrúðugt bakhús við Laugaveginn í febrúar. Þar una þær hag sínum vel ásamt hundinum Kóri enda hafa margir áhugaverðir og skemmtilegir viðburðir verið í götunni síðan hluti hennar var alfarið helgaður þeim sem ekki ferðast um á bílum.



Sjálfboðaliðar lögðu sitt af mörkum til að hreinsa út og koma Bíó Paradís í stand fyrir enduroppnun. Mikil ánægja ríkir með að borg og ríki hafi sameinað krafta sína og komið í veg fyrir að þessi merka menningarstarfsemi sem í áratug hefur veitt fólki andlega næringu og ánægju líði undir lok eins og á tímabili var útilit fyrir.



Hugrún Árnadóttir og Magni Þorsteinsson búa í Þingholtunum og hafa rekið verslunina KronKron í áratug en skóverslunina Kron í tvo áratugi. Þar selja þau eigin hönnun auk hönnunar hinnar japan-brasilísku Chie Mihara og einnig skó frá gæðafyrirtækinu Camper. Nú eru þau að flytja Kron í bjartara og rúmbetra rými á horni Laugavegs og Barónstígs



Reynir Guðmundson stendur vaktina í hinni goðsagnakendu Aðalvideoleigu - sem hefur verið starfrækt á fjórða áratugi. Í vor ákvað hann að koma til móts við þau sem höfðu ekki áhuga á að vera mikið á ferli og bætti við vörurvalið. Nú er ekki aðeins á boðstólum videóspólar, nasl og sælgæti heldur ýmislegt annað t.d. samlokur og mjólk.